

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

**po prijavi koncentracije privrednih subjekta „Amko Komerc“ d.o.o. Sarajevo“ i „Merkur“
d.d. Sarajevo**

**Sarajevo,
decembar 2011. godine**



Broj: 01-26-1-020-6-II/11
Sarajevo, 08.12.2011. godine

Na osnovu čl. 25. stav (1) tačka e) i 42. stav (1) tačka d), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi koncentracije podnesenoj od strane privrednog subjekta „Amko Komerc“ d.o.o. Sarajevo, Društvo za vanjsku i unutrašnju trgovinu, proizvodnju i usluge, Kolodvorska br.12, 71000 Sarajevo, zaprimljenoj dana 27.9.2011. godine pod brojem:01-26-1-020-II/11, Konkurencijsko vijeće, na 23. (dvadesetrećoj) sjednici održanoj dana 8.12.2011. godine, donijelo je

R J E Š E N J E

1. Ocjenjuje se dopuštenom koncentracija na tržištu trgovine na malo prehrambenim i neprehrambenim proizvodima na teritoriji Federacije Bosne i Hercegovine, a koja će nastati dugoročnim zakupom poslovnih prostora privrednog subjekta „MERKUR“ d.d. Sarajevo, Dioničko društvo za unutrašnji i vanjskotrgovinski promet, Semizovac bb, 71320 Vogošća, od strane privrednog subjekta „Amko Komerc“ d.o.o. Sarajevo, Društvo za vanjsku i unutrašnju trgovinu, proizvodnju i usluge, Kolodvorska br.12, 71000 Sarajevo.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 27.9.2011. godine zaprimilo Prijavu koncentracije (u daljem tekstu: Prijava) privrednog subjekta „Amko Komerc“ d.o.o. Sarajevo, Društvo za vanjsku i unutrašnju trgovinu, proizvodnju i usluge, Kolodvorska br.12, 71000 Sarajevo (u daljem tekstu: AMKO KOMERC ili Podnosilac prijave), koja će nastati sklapanjem ugovora o dugoročnom zakupu maloprodajnih poslovnih prostora privrednog subjekta „MERKUR“ d.d. Sarajevo, Dioničko društvo za unutrašnji i vanjskotrgovinski promet, Semizovac bb, 71320 Vogošća (u daljem tekstu: MERKUR), u smislu člana 12. stav (1) tačka b) pod 3) Zakona.

Podnosilac prijave istu je dopunio dana 13.10.2011. godine podneskom broj: 01-26-1-020-1-II/11.

Konkurencijsko vijeće je dana 15.11.2011. godine Podnosiocu prijave izdalo Potvrdu broj: 01-26-1-020-2-II/11, o prijemu uredne i kompletne prijave, u smislu člana 30. stav (3) Zakona.

U skladu sa članom 30. stav (2) Zakona, Podnosilac prijave navodi da nije podnio niti namjerava podnijeti zahtjev za ocjenu koncentracije nekom drugom tijelu nadležnom za ocjenu koncentracija izvan teritorije Bosne i Hercegovine.

Konkurencijsko vijeće je, u skladu s članom 16. Stav (4) Zakona, dana 28.11.2011. godine, izdalo Obavještenje broj: 01-26-1-020-4-II/11, o dostavljenoj Prijavi, koje je u dnevnoj štampi objavljeno dana 29.11.2011. godine, i pozvalo sve zainteresovane strane na dostavljanje pisanih komentara o namjeravanoj koncentraciji. Na predmetno Obavještenje, Konkurencijskom vijeću nisu dostavljeni komentari zainteresovanih strana.

Konkurencijsko vijeće je utvrdilo da je Prijava podnesena u smislu člana 16. stav (2) Zakona.

Konkurencijsko vijeće je u postupku ocjene dopuštenosti predmetne koncentracije utvrdilo slijedeće činjenice:

1. Učesnici koncentracije

Učesnici predmetne koncentracije su privredni subjekti: AMKO KOMERC d.o.o. Sarajevo, Društvo za vanjsku i unutrašnju trgovinu, proizvodnju i usluge, Kolodvorska 12, 71000 Sarajevo i „MERKUR“ d.d. Sarajevo, Dioničko društvo za unutrašnji i vanjskotrgovinski promet, Semizovac bb, 71320 Vogošća.

1.1. Privredni subjekt AMKO KOMERC d.o.o. Sarajevo

Privredni subjekt AMKO KOMERC upisan je u registar privrednih subjekta Kantonalnog suda u Sarajevu rješenjem broj UF/I-2505/99 od 26.07.2000. godine, sa osnovnim kapitalom od 155.000,00 KM, u vlasništvu fizičkog lica Aleta Muamera, ¹(..)**.

Pretežne registrovane djelatnosti privrednog subjekta AMKO KOMERC su vanjska i unutrašnja trgovina, trgovina na veliko i malo i proizvodnja.

Privredni subjekt AMKO KOMERC posjeduje 87,8% vlasništva u osnovnom kapitalu privrednog subjekta Trgovačko društvo za promet roba na malo, veliko i vanjsku trgovinu MARKETI d.d. Sarajevo (u daljem tekstu: MARKETI).

Pretežne registrovane djelatnosti privrednog subjekta MARKETI su vanjska i unutrašnja trgovina, trgovina na veliko i malo.

Privredni subjekt AMKO KOMERC kao član Ortačke grupe, koju na osnovu Ogovora o ortakluku br. OPU 3054/08 od 5.9.2008. godine čine privredni subjekti „Amko Komerc d.o.o.“ Sarajevo i VINO župa a.d. Aleksandrovac, Republika Srbija, posjeduje 69,25% dionica u privrednom subjektu „HEPOK“ d.d. Mostar.

Pretežne registrovane djelatnosti privrednog subjekta HEPOK su proizvodnja i prerada voća i proizvodnja vina.

¹(..)** podaci predstavljaju poslovnu tajnu

1.2. Privredni subjekt „MERKUR“ d.d. Sarajevo

Privredni subjekt MERKUR upisan je u registar privrednih subjekta Kantonalnog suda u Sarajevu rješenjem broj UF/I-1453/02 od 26.02.2003. godine, sa osnovnim kapitalom od 8.914.280,00 KM.

Vlasnička struktura privrednog subjekta MERKUR na dan 12.10.2011. godine je slijedeća: Društvo za unutrašnju i vanjsku trgovinu i usluge „MIMS“ d.o.o. Sarajevo, Semizovac bb, 71321 Semizovac, kao većinski vlasnik posjeduje 75,574%, Zatvoreni investicijski fond „NAPRIJED“ d.d. Sarajevo, Zmaja od Bosne 50, 71000 Sarajevo, posjeduje 11,306%, dok preostali dio dijele manji dioničari.

Pretežne registrovane djelatnosti privrednog subjekta MERKUR su trgovina na malo prehrambenim i neprehrambenim proizvodima.

2. Obaveza prijave koncentracije

Obaveza prijave koncentracije privrednih subjekata, u smislu odredbe člana 14. stav (1) Zakona, postoji ako ukupni godišnji prihod svakog od najmanje dva privredna subjekata učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8 miliona KM po završnom računu u godini koja je prethodila predmetnoj koncentraciji ili ako je njihov zajednički tržišni udio na relevantnom tržištu veći od 40%.

Ukupni ostvareni godišnji prihodi privrednih subjekata učesnika predmetne koncentracije na dan 31.12.2010. godine iznosili su:

Tabela 1.

Ukupni prihod (KM)	AMKO KOMERC	MERKUR *	MERKUR
Bosna i Hercegovina	² (..)**	(..)**	(..)**

Izvor: podaci iz Prijave; *prihod ostvaren u maloprodajnim objektima koji su predmet koncentracije

Prema podacima Tabele 1., ukupni prihod svakog od učesnika koncentracije ostvaren prodajom roba na tržištu BiH iznosi preko 8.000.000,00 KM po završnom računu u godini koja je prethodila koncentraciji, odnosno, ukupni godišnji prihod privrednog subjekata AMKO KOMERC u 2010. godini na nivou Bosne i Hercegovine iznosio je (..)**KM, dok je privredni subjekt MERKUR u istom periodu u maloprodajnim objektima koji su predmet koncentracije ostvario (..)**KM, što predstavlja (..)**% njegovog ukupnog ostvarenog prihoda od (..)**KM.

Obzirom da se u slučaju kada se koncentracija iz člana 12. stav (1) Zakona, odnosi na spajanje ili pripajanje dijela ili dijelova jednog ili više privrednih subjekata, bez obzira da li ti dijelovi imaju status pravnog lica, pri izračunavanju prihoda iz stava (1) člana 14. Zakona, obračunavat će se samo prihod onih dijelova privrednog subjekata koji su predmet kontrole koncentracije.

Godišnji prihod učesnika koncentracije predstavlja ukupne prihode bez poreza na dodatu vrijednost i drugih poreza, u smislu člana 9. tačka h) Odluke o načinu podnošenja prijave i kriterijima za ocjenu koncentracije privrednih subjekata („Službeni glasnik BiH“, broj: 34/10).

²(..)** podaci predstavljaju poslovnu tajnu

3. Pravni osnov i oblik koncentracije

Kao pravni osnov ove koncentracije Podnosilac prijave je dostavio: Predugovor o sklapanju Okvirnog ugovora o zakupu poslovnih prostora (19 maloprodajnih objekta na području Sarajeva i Mostara sa ukupno ³(..)**m² zakupljene površine) i preuzimanju drugih prava i obaveza zaključen dana 20.9.2011. godine u Sarajevu između AMKO KOMERC-a i MERKUR -a i Predugovor o sklapanju Okvirnog ugovora o zakupu poslovnih prostora Konjic i Vrapčići (2 maloprodajna objekta zakupljene površine od ukupno (..)**m² i preuzimanju drugih prava i obaveza, potpisan dana 22.9.2011. godine.

Predmet koncentracije su slijedeći maloprodajni objekti privrednog subjekta MERKUR:

Tabela 2.

R.br	Poslovni prostor/adresa	Mjesto	Ukupna površina m ²
01.	Hipermarket Otoka, Gradačaka 1	Sarajevo	(..)**
02.	Supermarket Vogošća, Omladinska 3	Vogošća	(..)**
03.	Prodavnica 19, Alekse Šantića 4	Mostar	(..)**
04.	Prodavnica 6, Blagaj	Blagaj	(..)**
05.	Prodavnica 706, Bolnička 34	Sarajevo	(..)**
06.	Prodavnica 1, Braće Fejić 76	Mostar	(..)**
07.	Prodavnica 8, Put za Opine 12	Mostar	(..)**
08.	Prodavnica 22, Braće Fejić 51	Mostar	(..)**
09.	Prodavnica 7, Domanovići bb	Domanovići	(..)**
10.	Prodavnica 700, Grbavička 44	Sarajevo	(..)**
11.	Prodavnica 23, Potoci bb	Potoci	(..)**
12.	Prodavnica 715, Teheranski trg 9	Sarajevo	(..)**
13.	Prodavnica 708, Jahijela Fincija 48	Sarajevo	(..)**
14.	Prodavnica 17, Maršala Tita	Mostar	(..)**
15.	Prodavnica 4, G.Vukovića 10	Mostar	(..)**
16.	Prodavnica 709, Grbavička 44	Sarajevo	(..)**
17.	Prodavnica 10, Braće Lakišić 10	Mostar	(..)**
18.	Prodavnica 711, Muhameda Hadžijahića 39	Sarajevo	(..)**
19.	Prodavnica 16, Braće Fejića 8	Mostar	(..)**
20.	Hipermarket Konjic, Sarajevska 43	Konjic	(..)**
21.	Hipermarket Vrapčići, Vrapčići bb	Mostar	(..)**
	UKUPNO:		(..)**

Izvor: podaci iz Prijave

Sklapanjem ovih Predugovora strane se obavezuju sklopiti Glavni ugovor, kojim će urediti odnose o dugoročnom zakupu maloprodajnih objekta na period od 10 godina, kupoprodaji zaliha u objektima, preuzimanju radnika zakupodavca i komercijalnu saradnju, ukoliko Konkurencijsko vijeće donese rješenje kojim se prijavljena koncentracija ocjenjuje dopuštenom.

U zakupljenim maloprodajnim objektima AMKO KOMERC će samostalno obavljati djelatnost trgovine na malo prehrambenim i neprehrambenim proizvodima.

U skladu s naprijed navedenim, a na osnovu člana 12. stav (1) tačka b) pod 3. Zakona, pravni oblik koncentracije je sticanje dominantnog uticaja jednog privrednog subjekta nad dijelovima

³(..)** podaci predstavljaju poslovnu tajnu

drugog privrednog subjekta, zaključivanjem ugovora o dugoročnom zakupu maloprodajnih poslovnih prostora, u skladu sa odredbama Zakona.

5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koji su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge za koje potrošači smatraju da su međusobno zamjenjivi obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Prilikom analize relevantnog tržišta učesnika predmetne koncentracije Konkurencijsko vijeće je utvrdilo da je relevantno tržište predmetne koncentracije tržište trgovine na malo prehrambenim i neprehrambenim proizvodima.

Prilikom određivanja relevantnog tržišta u geografskom smislu, Konkurencijsko vijeće je uzelo u obzir činjenicu da privredni subjekt MERKUR posluje isključivo na teritoriji Federacije Bosne i Hercegovine.

Slijedom navedenoga, relevantnim tržištem predmetne koncentracije smatra se tržište trgovine na malo prehrambenim i neprehrambenim proizvodima na teritoriji Federacije Bosne i Hercegovine.

6. Analiza relevantnog tržišta

Prema podacima iz Prijave na relevantnom tržištu trgovine na malo prehrambenim i neprehrambenim proizvodima, djeluje veliki broj privrednih subjekta s pojedinačnim relativno niskim tržišnim udjelom.

Navedeni podaci pokazuju da je relevantno tržište slabo koncentrisano, te da postoji veliki broj privrednih subjekta s relativno malim pojedinačnim tržišnim udjelima, koji onemogućavaju stvaranje dominantnog položaja.

Prema podacima iz prijave te podacima kojima raspolaže Konkurencijsko vijeće, ukupan prihod pravnih lica u Federaciji Bosne i Hercegovine u djelatnosti trgovine na malo prehrambenim i neprehrambenim proizvodima u 2010. godini iznosi 3.422.075.235,00 KM.

Procjena tržišnih udjela učesnika koncentracije na relevantnom tržištu za 2010. godinu:

Tabela 3.

Red.br.	Privredni subjekt	Prihod od maloprodaje	Tržišni udio (%)
01.	AMKO KOMERC	⁴ (..)**	(..)**
02.	MERKUR*	(..)**	(..)**
03.	Ukupno učesnici koncentracije	(..)**	(..)**
04.	Ukupno u FBiH	3.422.075.235,00	100,00

Izvor: AFIP, Podaci iz prijave; *prihod ostvaren u maloprodajnim objektima koji su predmet koncentracije

Podnosilac prijave u istoj navodi da na relevantnom tržištu u Federaciji Bosne i Hercegovine trenutno posluje u 48 maloprodajnih objekta i to na području slijedećih gradova:

- Sarajevo - 41 (četrdesetjedan) maloprodajni objekat;
- Konjic - 4 (četiri) maloprodajna objekta;
- Jablanica - 1 (jedan) maloprodajni objekat i
- Mostar - 2 (dva) maloprodajna objekta.

a privredni subjekt MERKUR na relevantnom tržištu trenutno posluje u 32 maloprodajna objekta i to na području :

- Sarajevo – 14 (četrnaest) maloprodajnih objekta;
- Konjic – 2 (dva) maloprodajna objekta;
- Mostar - 9 (devet) maloprodajnih objekta;
- Blagaj - 1 (jedan) maloprodajni objekat;
- Domanovići – 1 (jedan) maloprodajni objekat;
- Potoci - 1 (jedan) maloprodajni objekat;
- Pritoka - 1 (jedan) maloprodajni objekat;
- Zenica - 1 (jedan) maloprodajni objekat;
- Fojnica - 1 (jedan) maloprodajni objekat i
- Cazin - 1 (jedan) maloprodajni objekat;

te ima u izgradnji još 3 (tri) poslovna objekta i to po jedan u Sarajevu, Tuzli i Bosanskoj Krupi.

Analiza navedenih podataka o broju i geografskoj lokaciji maloprodajnih objekata oba učesnika koncentracije, ukazuje na to da privredni subjekt AMKO KOMERC predmetnom koncentracijom prvenstveno širi svoju maloprodajnu mrežu na relevantnom tržištu.

7. Ocjena predmetne koncentracije

Konkurencijsko vijeće je nakon procjene i analize podataka i činjenica u smislu člana 17. Zakona, u postupku donošenja predmetnog Rješenja utvrdilo da koncentracija predmetnih privrednih subjekata ne sprječava, ograničava niti narušava tržišnu konkurenciju na tržištu trgovine na malo prehrambenim i neprehrambenim proizvodima, u Federaciji Bosne i Hercegovine.

Pri donošenju ove odluke Konkurencijsko vijeće posebno je imalo u vidu da ova koncentracija nije značajno povećala tržišne udjele učesnika koncentracije na relevantnom tržištu, a istovremeno njeno provođenje omogućit će pogodnosti za potrošače u smislu:

- povećanja kvaliteta proizvoda;
- povećanja i proširenja mogućnosti izbora proizvoda i
- povoljnije cijene proizvoda.

⁴(..)** podaci predstavljaju poslovnu tajnu

Preuzimanjem poslovnih prostora drugoročnim zakupom, privredni subjekt AMKO KOMERC u predmetnoj koncentraciji preuzima samo dio tržišnog udjela privrednog subjekta MERKUR, koji nakon provedbe predmetne koncentracije, takođe ostaje prisutan na relevantnom tržištu sa 11 (jedanaest) maloprodajnih objekata u kojima samostalno obavlja djelatnost trgovine na malo prehrambenim i neprehrambenim proizvodima.

S toga je Konkurencijsko vijeće utvrdilo da su i zajednički tržišni udjeli učesnika predmetne koncentracije na relevantnom tržištu znatno ispod tržišnog udjela od 40,0%, koji pretpostavlja da privredni subjekt može imati dominantni položaj, u smislu člana 9. Zakona.

Konkurencijsko vijeće je takođe ocjenilo da na relevantnom tržištu ne postoje pravne i druge zapreke za ulazak drugih privrednih subjekata na tržište, niti su neophodna značajna novčana sredstva za pokretanje djelatnosti trgovine na malo prehrambenim i neprehrambenim proizvodima, tako da se učesnici koncentracije ni nakon provođenja iste, ne bi mogli ponašati u značajnoj mjeri nezavisno od stvarnih ili mogućih konkurenata.

Uzimajući u obzir sve navedene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) pod a) Zakona, kao što je odlučeno u dispozitivu ovog Rješenja.

8. Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», br. 30/06 i 18/11), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

9. Uputstvo o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

Ibrica Lakišić